

POLYGAMIA NECESSARIA.

FILAGO.

44. FILAGO *pygmaea*.

Gnaphalium roseum sylvestre *C. Barb. pin.* 263.

Filago maritima, capite folioso. *Tournef. inst.* 454.

Santolina, caule simplicissimo, foliis superioribus majoribus. *Roy. Lugdb.* 147: 7.

Habitat vulgaris per colles ad St. Ybes, Lisabon, Estremadura, Madrit.

Radix descendens, simplex, tortuosa, lateraliter fibrosa, ferruginea, planta ipsa sæpe longior.

Caulis interdum fere nullus, quasi acaulis, alias communiter brevissimus, simplicissimus, foliis omnibus imbricatis obtectus, superius triplo crassior ob flores plures eodem loco sessiles. Caulis locis fertilioribus nati semper sunt superius ramosi, ramis patulis in rosam; foliis imbricatis, summis majoribus, extrorsum semper majoribus interioribus reliquis.

Folia copiosa, arctissime imbricata, patula in rosam inferiora, superiora sensim majora, omnia linearia, obtuse acuta, tomentoso incana, inferius tomento laxo sibi invicem adherentia.

Flores terminales, sessiles in centro rosæ foliorum medio, flore majores in circulis. Variant alii minores, alii majores sparsi.

CAL. communis proprie nullus, sed *palea* aggregatæ calycem quasi constituunt.

COR. composita multiplex, ex floribus femineis per totum receptaculum, in centro paucis flosculis hermaphrodito-masculis.

Hermaphrodita corollula numero septem ad decem circiter, confertæ absque paleis interstinctivis; tubo filiformi, palearum circumambientium circiter longitudine: *Limbus* erectus, tubo levissime amplior, apice quadridentato: dentibus linearibus, erectis.

Femineæ copiosissimæ, singulæ intra singulas paleas: corollulæ filiformes, angustissimæ, apice bifidæ, vix observabiles.